

本朝分省人物考

人物考卷之十四目錄

南直隸鳳陽府

徐達

常遇春

韓成

傅友德

沐英

趙德勝

李文忠

鄧愈

湯和

馮國勝

補遺

李善長

本朝京省人物考卷之十四

南直隸鳳陽府

徐達

徐達鳳陽府鳳陽縣人元至正癸巳天下大亂我太祖集義旅達來麾下年二十有二初授鎮撫周旋二年上視其動靜語默悉超羣英於是拔諸將上乙未以身脫上於危難已而從渡江下采石定太平擒陳也先丙申二月破蠻子海牙舟師三月從征入建康命爲大將浮江東下取京口一日克其城授鎮江翼元帥府統軍大元帥未幾轉江南等處行

樞密院將數萬人攻圍毘陵張士誠遣其弟盛兵來  
援迎擊破之旣而厄於牛塘與常遇春夾擊敵衆擒  
其將張德復圍毘陵丁酉二月克之陞僉院繼克寧  
國八月以馬馱沙戊戌十月克宜興十一月 上親  
征婺州命守建康己亥四月池州捷聞陞奉國上將  
軍同知樞密院六月 上自浙還遣西征皖城旣旋  
自無爲登陸至浮山砦擊敗趙普勝部將胡總管因  
克潛山庚子五月設伏敗陳友諒於池州張士誠兵  
寇宜興城陷率師復之辛丑三月拜江南等處行中  
書省右丞八月進攻江州陳友諒棄城定武昌乃屯

兵漢陽之夏口以遏之回守江州尋召歸次中途令  
復守江州北至陳兵已入達遣兵與戰陳兵潰俘斬  
數千獲其眷屬壬寅下豫章命征武昌會豫章內變  
旋師討平之癸卯三月張士誠北寇壽春從上往援  
爲前部張兵敗北轉攻廬州將下屬友諒大兵寇豫  
章遂罷圍歸整舟師從上討之七月師次彭蠡友  
諒逆戰遂身先諸將敗敵奉命還守建康自是諸將  
效勇竟殲友諒甲辰正月陞左相國二月武昌平遂  
取廬州江陵常德等處乙巳十月取淮東丙午三月  
克高郵四月克淮陰安豐八月總兵二十萬東取吳

越鑾戰於湖州皂林之野生擒張兵六萬不戮一卒  
盡赴京師十一月師抵姑蘇營於葑門分遣別將於  
婁胥間諸門又築長圍困之架木塔與城中浮屠等  
築臺三庀下瞰城下城中震恐明年二月遣人自軍  
中請事 上降勅獎勞且云自後軍中緩急將軍可  
便宜行事時姑蘇城堅難猝破無錫莫天祐與張士  
誠爲聲援其部將楊茂善游水天祐遣爲偵羅卒獲  
茂送達釋而勞之待以心腹於是累遣茂往來因得  
士誠天祐虛實知城中困乏乃親督兵攻破之九月  
縛士誠送建康論功召見於戟門封信國公十月命

爲征虜大將軍帥諸將北取中原十一月克沂州降  
王宣取益都克東郡縣相繼款附十二月下濟南所  
過輯兵守禦兵不民擾戊申 上卽帝位加銀青榮  
祿大夫上柱國錄軍國重事中書右丞相信國公兼  
太子少傅二月克樂安三月引兵上黃河汴梁守將  
李景昌遁四月下洛陽長驅嶠函直抵潼關守者拒  
戰命馮勝拔之七月渡河取衛輝彰德廣平趙州由  
臨清上德州取長蘆至直沽獲其海舟作浮橋以濟  
師又令副將常遇春都督張興祖各率舟並河東西  
以進令步騎遵陸而前元丞相也速等望風奔走克

河西務通州元主及其后妃太子北走八月庚子進  
取元都至齊化門命將填壕登城而入達登齊化門  
樓執其監國宗室淮王帖木兒不花右丞張康伯等  
戮之封其府庫及圖籍寶物又封故宮殿門以兵守  
之宮人妃主令其宦侍護視號令士卒無得侵暴人  
民安堵市肆不移旣而順德守將吉右丞相胡叅政  
等皆自西山來降復獲前樂安逃將俞勝及南叅政  
等乃遣使赴京獻捷 上大嘉賞是月承詔置燕山  
等六衛以守禦北平十一月發北平取山西所過擇  
人守要害及平未附山寨十二月將圖太原謂諸將



曰聞擴廓帖木兒率師遠出太原取道保安以攻北平孫都督總六衛之師足以鎮禦若乘其不備直抵太原傾其巢穴則彼進不得戰退無所依此兵法所謂批吭擣虛者也若彼還軍救太原則已爲我牽制進退失利必成擒矣遂引兵徑進擴廓帖木兒至保安聞之果還兵達遣精銳夜襲其營擴廓聞變倉卒不知所出急踰帳後乘驛馬遁去遂克太原復遣薛顯傅友德擊賀宗哲等軍於石州而崞忻霍絳平陽等處皆平二年取鹿臺河中關中進克鳳翔會諸將議師所向諸將咸欲先幽州取慶陽後從隴西攻臨

洮達曰不然慶陽城險而兵悍未易猝拔臨洮之地西通番夷北界河隍其人足以備戰鬪其土產足以供軍儲今以大軍威之思齊不西走胡卽束手就降矣臨洮旣克則旁郡自下遂進克隴州至鞏昌降其平章梁子中總帥注靈真保乃遣右副將軍馮宗異征臨洮李思齊果不戰出降獻銀印等物張良臣聞而懼亦以慶陽降達征平涼良臣復叛達怒趣至涇州諸將咸以師會達命傅友德俞通海率精騎超其出入之路以絕聲援復令馮宗異湯和等四面圍其城良臣開城恣人馬馳騁城下達麾兵擊敗之久之

平章姚暉等知事不濟獻門納師良臣設井中引出  
斬之陝西悉平三年復總兵征沙漠大破王保保軍  
於定西遣將取興元復西平土番征哨極於西北始  
還是冬大封功臣授開國輔運推誠宣力武臣特進  
光祿大夫右柱國太傅中書右丞相進封魏國公叅  
軍國事食祿五千石賜誥命鐵券仍賜文綺百疋四  
年賜地若干頃佃戶若干戶守墳人百五十戶儀仗  
戶二十家復賜第京師表其里曰大功坊五年北征  
還命沿邊輯守歲鎮於燕口外餘民自是收盡生養  
休息海內無虞十七年召還至冬疾作 上遣使馳

召名醫視之及禱於神祇弗瘳明年二月薨年五十  
四 上慟悼罷朝親爲文祭之追封中山王謚武寧  
賜葬鍾山之陰親製神道碑旣備其功又稱其平昔  
言簡慮精當提兵之時令出不二諸將敬若神明所  
至攻城不屠與人不戲凡受命而出及功成而旋每  
不自矜至於封姑蘇之府庫置胡宮之美人財寶無  
所取婦女無所愛忠志無疵昭明日月復命享祭  
太廟塑像祭於功臣廟位俱第一

常遇春

常遇春懷遠縣人賦性剛直膂力絕人歲壬辰羣雄

並起江淮鼎沸時年二十有三爲羣雄劉聚所得每  
出戰必鼓勇爭先聚深喜之遇春察聚無成欲擇所  
依乙未聞太祖駐兵和州領衆數十人來歸居兩  
月餘請爲前部先鋒上曰爾姑從吾渡江俟克太  
平委身事吾未晚夏六月上先抵采石磯元兵陣  
於磯上磯下巨舟如織相距僅三丈猝難登岸遇春  
卽捨舟挺戈先登衆皆披靡遂拔采石乘勝取太平  
始授總管府先鋒冬十月陞管軍總管丙申春二月  
元中丞蠻子海牙復以兵屯采石命遇春統兵攻之  
遇春至設疑兵以分其勢而以正兵與之合及戰則

出奇兵擣敗之悉俘其精銳自是元兵扼江之勢衰矣尋守溧陽攻建康功爲諸將先三月從徐達克鎮江九月再攻常州會新軍叛去與僞吳張士誠合徐達被圍於牛塘遇春與諸將力戰大敗之擒梟將張士德十一月陞統軍大元帥丁酉三月克常州遷中翼大元帥四月從徐達下寧國八月克馬駝沙十一月取池州戊戌春擢江南行中書省都督馬步水軍已亥四月轉鎮國上將軍同僉書江南等處行樞密院事十二月攻杭州庚子夏還京師從徐達攻拔安慶趙普勝之水寨時僞漢陳友諒揚言援安慶遇春

策其必攻池州以羸弱守城伏銳士於九華山明日  
友諒果來伏兵四合俘殺萬餘六月 上整舟師襲  
友諒留遇春守京軍民無敢譁辛丑三月拜江南行  
中書省叅知政事七月從 上取安慶破江州回守  
龍灣十一月張士誠寇長興命遇春往援俘殺五千  
餘人壬寅羅友賢構亂據池州神山寨將與士誠通  
杭欵震動令遇春往攻之癸卯正月擒斬友賢餘黨  
悉平三月張士誠遣兵圍劉福通於安豐遇春從  
上擊之將戰遇春突入其陣三戰三勝敵兵大敗而  
去遂同徐達圍廬州凡三月適陳友諒攻南昌遇春

解圍而還秋七月從上率諸將往援八月遇友諒於彭蠡湖遇春與之聯舟大戰呼聲動天地無不一當百縱火焚僞平章舟風急火烈湖水盡赤敵將張定邊中天走友諒乃退保鞋山諸將遡流而上舟蔽江面控湖口者旬有五日友諒食乏出江求戰遇春遣火舟火筏禦之敵兵奔潰追北數十里自辰至未不解上所乘舟及遇春舟皆膠於沙遇春旣脫御舟而已舟被圍復力戰而脫於是友諒中流矢死士卒皆降未幾其臣立友諒之子理於武昌冬十月遇春帥師討之四面合圍甲辰二月理啣璧出降荆湖



之地皆附陞中書平章政事七月從徐達取廬州八月遂自將兵平臨江之沙坑麻嶺諸寨進攻熊天瑞於贛州乙巳正月克之悉定南安南雄韶州上褒諭曰予聞仁者之師無敵非仁者之將不能也今將軍破敵不殺是天賜將軍以奠我國雖曹彬之下江南何以加焉軍還頒賞復獎勞之夏五月取安陸襄陽十月從徐達克泰州丙午三月從克高郵四月淮安濠泗徐宿安豐皆下八月諸將攻浙西師次太湖僞萬戶尹義等逆戰遇春擒之直趨湖州之毘山水陸鏖戰敵兵大潰遂抵城下晝夜環攻之僞丞相張

士信悉發境中兵爲援屯於舊館遇春統奇兵出敵背絕其歸路士誠知事急出親兵拒鬪遇春一鼓勝之士誠復遣其將徐義統赤龍船親軍來援復擊敗烏鎮堡寨十月舊館降得兵六萬十一月湖州亦下遂進圍平江丁未圍之益急士誠收合餘燼背城百戰降其將士且盡秋九月始克之縛士誠來獻藉其兵二十有五萬乃加授中書平章軍國重事疏封鄂國進爵上公冬十月復授征虜副將同徐達奉命北征戊申上卽帝位加銀青光祿大夫上柱國兼太子少保與達下山東諸郡遂攻汴梁守臣李景昌遁

攻河南敵兵五萬屯於洛水之北將出戰遇春布陣  
既定單騎執弓矢衝入其隊敵發二十騎攢槊刺遇  
春遇春一箭中其前鋒大呼殺入悉獲其衆而河南  
諸城先後皆平七月達與遇春渡河河北諸郡又平  
八月二日燕都不戰而克元君北奔九月下保定中  
山十月取真定十二月師次太原守將擴廓帖木兒  
帥衆來禦其鋒銳甚遇春與達謀曰我騎雖集而步  
卒未至何以能戰莫若遣騎夜劫其營其衆可亂衆  
亂主將可縛也達如遇春言擴廓帖木兒果中傷而  
遁已酉正月進攻大同竹貞棄城走追擒之遂西入

秦張良弼遁李思齊迎降奉先鳳翔鞏昌臨洮又平五月元將也速兵侵通州召遇春東還拒之遂搗永平度鹿兒嶺至大寧也速遁破開平元君又北奔追至北河俘其宗王三人及平章鼎住等凡得軍士萬人車馬無算全師還燕次柳河川得疾而薨年僅四十計聞上震悼罷朝廷臣莫不灑泣越明日詔中書定議贈翊運推誠宣德靖遠功臣開府儀同三司上柱國太保中書右丞相追封開平王謚曰忠武八月朔日柩至龍江上親製文躬往祭之祭畢慟哭而還命擇地於鍾山草堂之原營基建祠旣葬

上念其功不置乃召儒臣撰爲神道碑文配享  
太廟肖像祭於功臣廟位皆第二遇春爲人守謙不  
矜有功無過運籌決勝不學而能其從大將軍東征  
西伐能遵守節制及其自將所至無不克捷其在  
上前或時有直諫無不嘉納真開國之殊勲也長子  
茂以父廕封鄭國公賜誥券次昇封開國公次森皆  
上所賜名長女許爲皇太子妃

韓 成

韓成虹縣人有勇略壬辰從 太祖舉義率先戎陣  
攻徐克泗破諸山寨甲午克滁州授鎮撫守禦乙未

渡江拔采石太平攻蕪湖丙申克金陵鎮江等處陞  
元帥守金壇從攻常州敗援兵解牛塘圍遂取揚州  
從下婺州復池陽戰龍江擣江州下南昌皆有功陞  
帳前總制親兵左副指揮使侍帷幄從援安豐攻廬  
州僞漢陳友諒兵圍南昌成從上親征大戰於鄱  
陽湖自戊子至庚寅三勝之後酣戰被圍一時羣將  
計無所出成進曰臣聞古之人有殺身以成仁者臣  
不敢辭遂賜成龍袍冠冕與上服同對賊衆投水  
中賊遂退友諒敗死上還建康謂中書省臣曰自  
古兵爭忠臣烈士往往以身殉國朕與陳友諒戰於

鄱陽韓成效忠死敵朕念之不忘爾中書其議所以  
崇報之禮贈高陽郡侯建忠臣祠康郎山命有司歲  
時祭之

### 傅友德

傅友德宿州人少驍勇多力擊刺騎射冠絕一時初  
走武昌從陳友諒忽忽無所展聞上伐江州乃以  
所部謁見於小孤山上奇之俾爲別將屬常遇春  
援安豐掠廬州還從擊陳友諒於鄱陽湖友德輕舟  
盪其鋒身被數創戰益力復與諸將邀之禁江口友  
諒死復從上圍武昌城東南有高冠山下瞰城中

上顧諸將誰能奪此山者賞友德卽率萬人先登一鼓而奪之流矢中頰鏃出腦後不爲沮武昌平超授指揮使復從徐達下廬州西取夷陵略衡州襄陽俱取之與元守兵戰身被九創破擒其將任亮還師進逼淮安破張士誠援兵於馬驢港復大破元將竹貞於安豐 上卽吳王位之元年友德守彭城而王保保大將李二來寇勢張甚友德度兵寡不敵伺其衆方肆掠率步騎二千自呂梁渡直趣擊之單騎刺驍將韓乙墜馬師乘而進遂敗之友德度賊且復至開城門陣於野使皆臥鎗以待聞鼓卽起李二果盛



兵至輕我師寡競而囂友德鼓之士騰躍搏賊遂敗  
之縛李二以獻 上大悅召友德還建康進江淮行  
省叅政命以麾蓋鼓吹送歸第明年大將軍北征友  
德從破沂州斬其將王宣下青州元丞相也速率數  
萬騎來爭大將軍設伏友德以輕騎五百爲誘敵追  
至伏而廻師擊之伏盡發也速敗走遂取萊陽明年  
從取東昌樂安復從克汴梁及收諸山寨復從渡河  
取衛輝彰德遂東取廣平滄德進克元都以精騎偵  
邏諸隘掩其殘卒略大同而還從徇保定中山真定  
皆下遂克太原王保保自保安來援兵未交萬騎突

至友德帥死士五百拒却之因夜伏兵掩其營王保  
保乘驛馬走友德追至土門關盡獲其士馬復敗賀  
宗哲於石州逐竹貞至宣府復從大將軍西入關走  
張思道於鹿臺逼臨洮降其大帥李思齊關陝悉平  
明年復從大將軍擣定西大破王保保收其士馬輜  
重移兵伐蜀友德領前鋒出秦州奪略陽關虜其平  
章蔡琳遂入沔分兵入連雲棧合攻漢中克之以饋  
運不繼還軍西安蜀將吳友仁謀復漢中兵大至友  
德以精騎三千攻斗山寨夜令人持十炬列山上蜀  
兵驚遁凱旋大封功臣授穎川侯食祿千五百石尋

進同知大都督府事是歲冬議伐蜀征西將軍湯和  
副將軍廖永忠由瞿塘以舟師趣重慶友德爲征虜  
副將軍由秦隴以步騎趣成都旣受命 上復密諭  
友德謂蜀人聞我西征必悉精銳東守瞿塘北阻金  
牛以抗我師若出其意外直擣階文門戶旣隳腹心  
自潰兵貴神速但患不耳友德至陝卽趨陳倉選  
鋒攀緣山谷晝夜行大軍繼之直抵階州蜀斷白龍  
江橋阻我都督汪興祖躍馬直前中飛石死友德奮  
攻拔文州兵渡白水江遂趨綿州至漢江造戰艦將  
進兵漢州夏丞相戴壽太尉吳友仁悉衆守瞿塘聞

友德破階文擣江油壽友仁分瞿塘守兵還援未至友德舟師逼漢州敗其將向太亨遂迎擊壽兵敗之拔其城七月壽太亨以成都降湯將軍亦克重慶等處友德分兵盡下川蜀諸郡縣十月還京明年副征西將軍馮勝由西路出金蘭友德先率驍勇五千騎馳趣西涼遇元將失剌罕戰敗之至永昌又敗其將朶兒只巴進略甘肅手射殺平章不花降太尉瑣納兒等計獲馬牛羊十餘萬是時師出三道獨友德獲全勝踰年大軍復出雁門巡長城外友德爲前鋒虜聞之絕漠徙去追獲其平章鄧宇羅帖不見等還軍

鎮北平上疏言便宜五事 上報曰將軍言是其下

所司悉從將軍尋召還同中山侯和發兵駐延安以  
備伯顏帖木兒僞請和 上乃陽召和還而留友德

以誘之伯顏帖木兒果入寇友德設伏縱擊大破之  
獲其士馬輜重無算 上將下雲南命友德巡行川

蜀永寧等處修城郭繕關梁撫納金筑普定等諸土  
夷皆納款還獻馬五百疋 上別選內廐良馬十五

疋賜之虜乃兒不花寇邊復從大將軍達出塞抵北  
黃河夜覆其灰山寨十四年命爲征南將軍率左副  
將軍藍玉右副將軍沐英諸徹侯大將步騎三十萬

討雲南軍行 上親餞之龍江友德行二十日至湖  
廣分遣都督胡海洋等選精卒五萬由永寧趣烏撒  
而自率大軍由辰沅趣貴州進攻普定克土酋安瓚  
羅冠仇狴諸苗望風而降至普安復攻下之遂進兵  
曲靖梁王把匝刺瓦爾密遣其司徒達里麻來拒戰  
友德用右副將軍英策勒兵至白石江揚聲欲渡而  
別遣精卒數千從下流掩其背衆亂友德乃麾衆畢  
渡遂大破之擒達里麻俘其衆以萬計友德縱之歸  
農謹聲聞遠邇友德遂自率衆謁烏撒而遣兩將軍  
趣雲南梁王走死雲南平分道徇郡邑之未下者友

德兵已抵烏撒欲通胡海洋兵循格孤山而南諸蠻皆遁遂城烏撒工甫集蠻復大至友德故持重不戰以老之士踴躍思奮乃前爲陳蠻麋集友德鼓士騰赴遂大破其衆斬首三千餘級蠻遁遂城烏撒得七星關以通畢節於是東川烏蒙芒部俱請降威楚曲靖澂江及諸路亦降左副將軍藍玉等復進兵下大理虜其帥段世分兵取鶴慶略麗江蕩金齒雲南悉平乃詔友德玉等還京而右副將軍英以數萬衆留鎮之友德入見宴勞有加進封穎國公子孫世襲以皇女歸其子忠尋以左副將軍同大將軍勝北

襲虜於金山盡降其衆尋召還率辰沅貴州諸衛兵討平廣西之韃靼反者東川蠻復叛率諸軍往討之且討越州之叛酋阿資道築平夷千戶所進擊阿資破之遂平平越諸叛酋 詔還軍駐沅州尋召還京爲征虜前將軍率副將軍趙庸曹興等赴北平從燕王襲元太尉乃兒不花等降之悉收其部落 詔以諸降將還朝尋命援信國公和例還鄉賜黃金三百兩白金二千兩綾綺三十疋給兵百二十人爲衛再以征虜將軍率王弼郭英等於山東北平諸屬衛選練精卒備邊尋從燕王捕諸番將阿失里等復命同



宋公勝涼公玉往陝西練將士未久召還復出理山西諸衛兵已副宋國公總山西河南兵馬屯田公侯在事者悉聽節制還進兼太子太師自藍玉敗友德與宋公相繼暴卒子孫不得襲封云

### 沐英

沐英定遠人父母蚤亡上收爲子旣長機穎過人與李岐陽等俱冒國姓賜名文英數從上征伐入侍帷幄晝夜勤勵目無迂視上心器之壬寅年十八爲帳前都尉從守鎮江居四歲擢親軍指揮使加授昭勇大將軍以所部從下福建擒僞平章陳友定洪武

元年歸其沐姓而單名英擢鎮國將軍三年僉大都督府事明年進榮祿大夫同知大都督府事時都督不爲階官而英特受九年命乘傳繇陝西巡行諸路布上恩惠事有不便者輒更置而後聞且使練諸部兵以待明年遂副寧河王征西番西渡黃河略烏思藏耀兵至於崑崙轉戰數千里俘虜士卒萬計師還而寧河王道卒英代將其衆還京師封西平侯食祿二千五百石賜鐵券又明年拜征西將軍窮追西番降元萬戶乞失迦夷其部落擒洮州十八族番酋并其衆二萬餘雜畜二十餘萬平朶甘納兒七站地數

千里十四年以所部從太將軍出古北口襲公主山  
長寨掩四部卒渡驢胸河獲知院李宣十五年以征  
南右副將軍同穎川侯傅友德下雲南綵辰沅出羅  
鬼遂躡普安至白石江梁王把匝剌瓦爾密遣其司  
徒達里麻選甲十萬來拒穎川侯旣用英策渡師英  
乃馳鐵騎搗其中堅下流之師自旦至晡生縛達里  
麻賊大潰僵屍百里直抵雲南諸郡皆下獨大理猶  
爲元守英與永昌侯攻之擒段世板大理移兵取車  
里平緬不洩月雲南郡邑悉平復與穎川侯分道平  
東川烏蠻寇而夷兵叛者合圍雲南守帥馮誠告急

英簡萬騎馳救之賊夜遁乘勝急擊遂悉復曲靖永昌之失守者是年諸將班師詔英留鎮雲南平廣南蠻破平摩沙勒斬首千餘級二十一年麓川宣慰思倫發聚衆三十萬來寇定遠英選卒三萬拒之馮誠領前軍竄正湯昭爲左右大戰左軍小却英令左右斬左軍帥首左帥遙見一人拔刀馳下卽麾衆復前英責戰益急不移時寇大敗明年復平東川破叛酋阿資入朝賜宴於奉天殿賚黃金二百兩白金五千兩綵幣百襲陞辭上撫之曰使我高枕而無南顧憂者爾也英歸鎮二十三年復大破阿資衆走之

二十四年使使以兵威折脇八百國并諸番有重譯  
貢者初英留鎮之明年哭 孝慈皇后再鎮之三年  
哭 懿文太子極哀吐血卒年四十八訃聞 上慟  
哭命以喪歸賜葬觀音山追封黔寧王謚昭靖侑享  
太廟有五子其一子早卒而三子遞鎮雲南少子  
昕尚 文皇帝公主爲駙馬都尉屢掌南京都督府  
以壽考終

### 趙德勝

趙德勝鳳陽人狀貌魁偉膂力過人馬上運槊捷疾  
如飛爲帳前先鋒從克和陽儀真陞總管先鋒敗方

山營苗軍水寨收丹陽金壇廣德宣城轉領軍先鋒  
戰毘陵湖州擢左副元帥戰友諒龍江下銅陵臨山  
寨出淮南征高郵陞統兵元帥從破漢水寨走友諒  
收黃梅廣濟克瑞臨吉撫四郡祝康據南昌叛殺葉  
琛從復南昌授僉江南行樞密院事臨江吉撫三城  
叛又復三城協守南昌統精兵爲戰將癸卯漢圍南  
昌出戰射殺僞漢金指揮益兵晝夜急攻城且壞德  
勝先諸將死戰且戰且築城壞復完巡城至東門敵  
發礮張弩中腰臂箭深入六寸卽拔出拊髀歎曰命  
也奈何大丈夫死卽死死恨不能從 主上掃清中原

垂名竹帛耳卒子獻領其衆德勝沉鷺簡靜剛明質  
真馭下嚴肅號令一行旗幟改色平生未嘗讀書隨  
機應變智略如神曾孫輔立功封武靖侯時張元帥  
子子明代父爲間使走金陵求援還至湖城被執友  
諒強官之令徇城給降子明佯許至城下大呼我張  
大舍已見主上令諸公堅守救兵且至賊怒卽攢  
槊刺死友諒滅贈武毅將軍飛騎尉千戶後加贈忠  
節侯

### 李文忠

李文忠字思本泗州盱眙人父貞尚 皇姊曹國長

公主生文忠十二歲而公主薨時天下亂文忠與

上相失甲午冬上駐兵滁陽文忠父子來見上

喜甚養以爲子賜姓朱氏初令就學聰悟輒能記憶

上曰人固不可不知書然今方事武且當令習弓

馬丁酉年十九以舍人領軍往援池州陳友諒兵寇

城文忠奮擊敗之戊戌正月進攻青陽太平旌德皆

下二月敗元院判阿魯灰於淳安縣遂破苗軍於昌

化獲其人口資貨甚富文忠恐士卒貪貨賄莫有闢

志因悉焚之曰此何足惜能努力破敵何患不富貴

乎進取淳安夜襲破僞洪元帥營降其衆千餘三月



會同僉鄧愈院判胡大海兵取嚴州克之立德興翼  
元帥府授帳前總制親軍兼領元帥府事守嚴州時  
嚴州新附城守未備而苗帥楊完者兵水陸奄至文  
忠出奇大敗其衆以所斬俘馘載巨筏中順流而下  
餘衆見之皆遁五月楊完者復率衆進屯嚴州烏龍  
嶺欲攻建德文忠復從鄧愈擊走之六月文忠以浦  
江與建安比境乃先率兵由間道取之八月苗軍元  
帥泰不花等以同僉員成書來納款且言其部帥李  
福等皆願效順文忠以上命慰諭之九月員成遂  
率元帥劉濟劉震黃寶蔣英等三萬餘人來降己亥

二月張士誠遣將攻嚴州文忠出兵夾擊大破之四月士誠兵復至大浪灘文忠出擊復破之又遣元帥何世明攻分水縣斬首五百餘衆潰走士誠憤其敗遣其將陞元帥花將軍據分水縣夏元帥之新城三溪遏我師文忠仍遣世明率精兵千餘擊之斬陸元帥等千餘人焚其營自是士誠兵不復窺嚴州庚子九月同僉行樞密院事辛丑上命城嚴州越三月而成復承命署金華分省事壬寅二月金華降將蔣英劉震等叛殺胡大海據其城文忠聞之卽遣掾史郭彥仁元帥何世明等往討之英等懼夜半驅掠

城中子女開門南走文忠因率元帥袁洪等所部兵  
守之分遣左右遍歷其地撫輯人民處州李佑之聞  
蔣英殺胡大海亦殺院判耿再成等文忠隨遣王祐  
何世明往屯縉雲以圖之三月陞文忠爲浙江行中  
書省左丞總制嚴衢信處諸全軍馬辛亥張士誠弟  
士信乘蔣英之亂率兵萬餘圍諸全文忠遣胡德濟  
往授以計敗之癸卯九月諸全叛將謝再興以張士  
誠兵犯東陽文忠率部將敗之義烏乙巳二月張士  
誠憤義烏之敗復遣李伯昇將兵二十萬挾叛將謝  
再興寇新城胡德濟告急於文忠乃先命指揮張斌

等領兵出浦江爲聲援士誠又以兵自桐廬犯嚴州  
文忠命以舟師扼於江以何世明等三帥守城而率  
指揮朱亮祖以下行次浦江啣枚而進且檄處州兵  
來會至龍潭距寇不二十里有白氣覆我軍旣而候  
卒告寇至文忠馳馬以視會所檄處州兵至遂與敵  
戰大敗之追奔十餘里死者數萬獲其僞同僉韓謙  
理問勝忠等六百餘人李伯昇及僞五太子遁去  
上聞新城捷以御衣名馬賜文忠齎賞將士有差丙  
午九月命文忠以兵取杭州文忠率指揮朱亮祖耿  
天壁攻桐廬僞元帥戴某降文忠復遣指揮袁洪等

攻富陽克之兵至餘杭遣孫虎等領兵扼其援而自  
督兵圍其城十一月守將謝五以餘杭降文忠以其  
兵攻杭州僞平章潘原明亦出降并執蔣英劉震以  
獻文忠以上命慰諭之宿諸軍於城上下令曰敢  
有人民居者斬有一卒取民釜以爨卽磔於市以徇  
城中民皆按堵始入城原明以女樂迎於道叱去之  
獲元平章丑得長壽等與蔣英俱繫送金陵并遣潘  
原明以下官屬隨行十二月陞文忠爲平章政事復  
姓李氏吳元年二月加榮祿大夫浙江等處行中書  
省平章政事初上得金陵以軍民不給知府王顯

嘗請增田租民頗病之文忠以其事聞請減其額

上從之洪武元年五月福建陳友定餘黨金子隆等  
糾合散卒寇延平等處閏七月 上命文忠總兵擒

獲之閩地悉平二年春以文忠爲偏將軍副常遇春  
征迤北敗元將江文清軍於錦川次全寧元將也速  
迎戰又敗之遂進克上都元主北走俘其宗王慶王  
等常遇春薨於軍詔文忠領其衆援慶陽師至太原  
而大將軍徐達已討平慶陽時大同受敵甚急文忠  
乃出鴈門次馬邑破其邏騎數千進次白楊門又擒  
黠虜四大王遂大破虜衆擒其將脫列伯大同圍解

三年正月授征虜副將軍總兵北伐二月師至興和降其守將進師擒其平章竹貞五月敗元太尉蠻子等於白海之略駝山進至開平聞元主在應昌卽提兵兼程襲之遂進克應昌時元主已殂太子愛猷識理達臘單騎遁去獲其嫡孫買的里八剌及太子妃陳答里宮人諸王省院達官暨宋元玉璽金寶一十五宣和殿玉圖書一玉冊二鎮圭大圭玉斧玉帶各一送京師文忠復追愛猷識里達臘至北慶州失其所在師過興州遇元將江文清等率部屬來降至紅螺山又降其部將楊思祖等萬餘人十月班師至

龍江 車駕出江 上嘉勞甚至明日文忠復上表稱賀 上論功行封授特進榮祿大夫右柱國大都督府曹國公同知軍國事食祿三千石復錫券及文綺六十匹四年七月西蜀平詔文忠按行四川開拓新城經畫庶務乃調濠梁等衛官軍於保寧諸處各立千戶所以鎮之五年正月 上賜彤弓百交趾弓五十 上嘗御武樓與諸將論邊事魏國公徐達因言王保保遁在和林宜乘其敗而擊之 上乃詔達與文忠及馮勝率兵十萬分三道并進虜聞之棄營遁走進至哈刺莽來虜部落皆驚潰文忠諭將士曰



兵貴神速千里襲人難以重負命士卒人持二十日糧兼程而進至土刺河虜將蠻子哈刺章悉騎渡河結陣以待文忠督兵與戰數合虜稍却追至阿魯渾河虜兵益衆宣寧侯曹良臣等戰歿文忠馬亦中流矢下馬持短兵接戰從者劉義直前突擊以身蔽文忠指揮李榮以所乘馬授文忠自奪虜騎乘之文忠麾衆更進士卒殊死戰虜衆遂敗得馬畜萬計追至瀚海虜兵復集文忠整兵據險縱所獲馬畜於野示以閒暇居三日虜疑有伏兵不敢逼乃遁去文忠引兵還夜行失故道糧盡至桑哥兒麻士卒無水渴甚

有死者文忠默禱於天忽所乘馬跑地而鳴掘之果有泉湧出人馬賴以濟六年正月詔文忠往山西北平訓兵防守十月詔率諸將士養銳山西以防虜寇七年三月文忠駐兵代縣遣將四出至白登俘其國公鄧孛羅帖木兒至朔州擒其太尉伯顏不花七月攻大寧高州大石崖克之斬其宗王朶朶失里復遣指揮唐其追至羶帽山遇故元魯王營於山下以兵圍之斬魯王等獲其妃蒙哥顏八月師進豐州分道追擊胡兵擒其故官十二人虜衆百二十餘人十年秋詔致祭泰山十二年二月復制諭文忠往岷州臨

洮鞏昌等巡視城池各衛軍馬悉聽節制六月移師  
駐鞏昌十三年詔還叅贊軍國事十六年正月詔文  
忠兼蒞國子監事十七年春疾亟 詔皇太子臨視  
上復親幸其第撫慰良久至是薨年四十有六文  
忠性沉厚持身誠恪有謀慮臨陣常身先士卒至遇  
大敵膽氣益壯每戰勝必以功推下及釋兵家居恂  
恂若儒者其在 上前論事盡誠無隱 上多嘉納  
之薨之日 上痛悼不已親爲文遣使致祭追封岐  
陽王謚武靖仍進封其上三世皆王爵子三人皆  
上所賜名長景隆襲爵次增枝前軍左都督次方英

中都正留守

鄧愈

鄧愈虹縣人生而魁偉勇力過人元季天下雲擾父順興起兵於鄉遂戍臨濠與元兵戰死之兄友隆代領其衆未幾卒衆推愈領軍事年方十六每出戰必挺身破敵人服其勇歲乙未上駐師滁州愈自盱眙率所部來附充管軍總管六月從渡大江克采石取太平繼而元帥蠻子海牙以舟師寇采石陳也先合兵數萬逼城下上親督兵禦之調愈與徐達以奇兵出其後大破之生擒陳也先丙申三月定金陵

破鎮江愈皆有功陞元帥出守廣德十二月長鎗謝  
元帥率衆來寇愈出城奮擊俘其總管武世榮及軍  
士一千餘人丁酉三月轉行樞密院判移戍宣州七  
月領兵取休寧績溪乘勝取徽州十月浙江苗楊元  
帥率衆十萬餘來攻城時徽初附城廓未完愈激勵  
將士明立賞罰與胡大海分門並守奮兵力戰大破  
之賊衆奔潰婺源元帥汪司領兵來降戊戌正月擊  
破帖木兒不花元帥寨斬首五百餘級追殺帖木兒  
不花遂取婺源三月取嚴州四月取淳安縣五月浙  
江苗楊復率衆屯徽之烏龍嶺拒却之九月轉僉書

行樞密院事己亥五月領兵略浙西臨安大破張寇  
於閑林寨庚子七月鄱陽院判于光左丞余椿擊走  
僞漢同知取饒州遂以其城來附命愈往鎮之饒州  
濱彭蠡湖而僞漢陳友諒尚據江州數遣舟師來攻  
城愈與于光等連營拒之屢殲其衆賊兵遂退辛丑  
除江南行省叅政總制各翼軍馬八月領兵襲浮梁  
僞叅政侯邦佐棄城遁遂取樂平擊敗蕭總管五千  
餘衆饒境悉定進取江西時鄧克明據撫州遣使通  
款而實無獻城之志愈知其情卷甲夜趨比旦入城  
克明單騎遁愈號令嚴肅秋毫無犯江石之民室家

相慶爭持牛酒迎勞愈却不受時 車駕至南昌有

旨授愈江西行省叅知政事留鎮之癸卯四月陳  
友諒悉國內之兵圍江西江水暴漲寇舟直抵城下  
愈與諸將協謀固守屢挫其鋒相持者凡三月會

上親率援兵至湖友諒懼而退大戰康郎山友諒敗  
死甲辰三月新淦土豪鄧清叛以卒二萬人據永豐  
愈調兵破之擒首賊胡理問劉右丞等八月同開平  
王平臨江諸山寨遂合兵圍贛州熊天瑞出降贛既  
平南安南雄韶州皆下 上賜勅褒諭進江西右丞  
加湖廣行省平章移鎮襄陽西抵巴蜀北控河洛烽

火相望新附之民未有定志愈恩敷襄漢民懷其惠  
軍忘其勞四境謐寧遐邇悅服吳元年十月擢拜御  
史大夫洪武元年加兼太子左諭德時方經略中原  
乃命愈爲征西將軍取江淮未附州郡三月攻唐州  
克之又取南陽生擒蔡國公史克新等二十七員軍  
士一千五百人七月克隨州右丞王誠降九月進取  
洪山老馬劉寨夜四鼓斬關而入擒殺甚衆三年命  
爲征虜左副將軍同大將軍平隴右大敗王保保於  
定西招諭河州土蕃元帥何鎖南普花兒等皆納印  
請降於是河州以西朶耳烏斯藏等部來歸者甚衆



十一月定功行賞授特進榮祿大夫右柱國封衛國  
公叅軍國事食祿三千石賜誥命鐵券仍賜文綺及  
帛臨濠地若干頃田戶若干戶守墳人百五十戶儀  
仗戶十九家復賜第於京師五年命討澧州等處溪  
洞蠻夷平之九年土番所部川藏邀阻烏斯藏使者  
掠其輜重有 旨命爲征西將軍往討之十年四月  
愈興副將軍分兵馬併力齊入覆其巢穴追至崑崙  
山斬首不可勝計 上嘉其功使自河州召還行至  
壽春以疾薨年四十一訃聞 上哭之哀追封寧河  
王謚武順柩至三山門 車駕臨奠且親視其葬地

勅有司營墓召朱夢炎撰爲神道碑以昭其烈又配  
享太廟肖像祭於功臣廟愈器量宏偉謙恭愼密  
臨大敵而不懼有大功而不矜禮賢下士寬惠愛人  
事母致孝撫弟致愛惠撫廣德徽饒等處至今猶懷  
其德云

湯和

湯和字鼎臣鳳陽濠州人幼喪二親卓越有奇志嬉  
戲常習騎射指使羣兒父老異之及長倜儻饒智略  
歲壬辰聞滁陽王據濠勢強率所厚壯士十餘人仗  
劍往從王以和驍勇命爲百戶取九灣攻濠之定遠

得兵千五百人擢爲千戶時 太祖處王甥館和委  
心推奉從攻大紅山寨得兵八百復攻滁州降其首  
帥以功多授管軍總管招集士卒益衆乙未正月  
上自將取和州和聽命甚謹 上心嘉焉會元陳也  
先復攻和州和與將士擊走之六月從 上渡江下  
采石定太平旣而也先與其將水陸分道寇城和擊  
其水軍矢中左臂怒氣益奮中山王徐達寧河王鄧  
愈率師轉戰城北破其步軍遂生擒也先以獻和分  
兵取溧水句容克而守之丙申三月和偕徐達取鎮  
江一日克其城兵不血刃復偕達取金壇及富莊七

月轉同僉樞密院事丁酉三月克常州奉命鎮守其地攻取江陰明年僞吳張士誠寇常州和力戰却之擒其卒三百十月復來寇俘甲士千餘賊勢少阻壬寅同徐達攻無錫癸卯大破士誠兵於錫山斬其梟將獲甲首五百級拜中書左丞甲辰士誠弟士信寇圍長興和率部將會常遇春軍合戰士信大敗而退超遷中書平章乙巳擊江西劇盜姚大膽斬之取永新州戮僞丞相周安等籍士馬歸於京師仍出守常州丙午上命與諸將伐士誠降僞將呂珍等得兵六萬人轉戰湖州守將張右丞降進擊吳江遂薄

姑蘇縛士誠歸三吳悉定除御史大夫兼太子諭德  
階榮祿大夫時方谷珍據台溫慶元三郡和督諸軍  
征之谷珍懼乘大舶逃匿海島中和遣人持書喻以  
國家威德谷珍卽率昆弟子侄待罪軍門得兵械舟  
楫以萬計乘勝下福州洪武元年略定閩中諸郡延  
平主帥陳友定怙險橫甚令副將出降觀望持兩端  
和虜之以歸五月同宋國公馮勝取懷慶澤潞晉絳  
二年同徐達拔河中渡河入潼關趨鳳翔越六盤關  
隴皆平明年與徐達馮勝至定西襲元將擴廓帖木  
兒營西北取靈夏皆以勞先諸將是冬還京論功行

實授榮祿大夫柱國封中山侯食祿一千五百石賜  
誥命鐵券四年 上以明玉珍之子昇尚僭號都重  
慶詔和及廖永忠統諸將征之昇鎮瞿塘峽以遏舟  
和以計敗之水陸並進直擣僞都昇不能支率其臣  
屬奉金寶以降五年同徐達北征窮追和林八年移  
鎮彰德薨其城是冬追元逋臣伯顏帖木兒及察罕  
惱兒獲馬牛羊無算十年正月 上念和功加號推  
誠位特進進爵信國公俾議軍國事仍賜鐵券和益  
恭畏不驕明年巡撫河州繕完其城郭營舍十四年  
偕徐達北伐下灰山擒其平章別里哥及樞密副使

文通又明年 詔至四川永寧治墉壕飭士馬十八  
年五開山獠爲亂帥師討之夷其窟穴俘戮四萬餘  
人及入朝和以春秋高乞骸骨 上賜寶鈔五萬俾  
造第鳳陽而謂和曰日本小夷屢擾東海卿雖老強  
爲朕行視要地築城增戍以固守備和行築海上數  
十城民四丁取其一爲兵以守之二十一年新第成  
率妻子 陛辭賜黃白金文綺俱極優厚復降 手  
勅褒嘉之二十三年賀元旦於京師忽感疾且失音  
不能言 上聞之大驚卽命輟賀臨視歎惋久之遣  
歸故里十月詔和子將命召至京賜以安車入殿庭

燕勞備至復厚賚俾歸以俟疾瘳二十七年和疾彌甚不能興上思見之特詔輿入覲手爲摩撫語以舊勞對之雪涕錫鈔六百五十緡預爲營葬之資二十八年八月薨於里第年七十訃聞上感悼輟朝追封東甌王謚襄武親爲文授使者以祭命親王咸遣祭於其家棺槨明器塚壙皆官爲之祥禪必賜祭恩禮之隆時莫與比和沉毅質直勇而善斷不妄發言人聞國論一語不泄於左右行師受任有詔卽行臨敵果敢堅忍未常挫衄有語及兵書者輒笑曰臨陣決機在智識敏達耳何以泥古爲家蓄媵妾百



餘暮年皆資遣寧家得賞賜多惠鄉黨父老及孤貧  
無告者貴極公宰及歸田里見故交遺民意驩如也  
獨享壽考以令名終

### 馮國勝

馮國勝定遠生時黑氣滿室若煙霧然經日不散人  
異之長而謹厚姿貌磊落長軀勇毅且多智略有相  
者曰此子骨格清奇特有英風烈氣他日必以武致  
富貴勝聞之曰吾立身願忠孝弗富貴圖也是後喜  
讀書融會義理與兄國用講論兵法夜分不寢智略  
益充暇則馳馬試射發無不中歲甲午與國用伏謁

太祖於妙山 上見而奇之用置左右從克滁州  
三汲河和州版門砦乙未春陳也先犯和州獲其全  
軍六月渡江拔采石取太平丙申二月敗元中丞蠻  
子海牙并師三月克臺城還軍從擊鎮江寧國擢萬  
戶丁酉攻下甘露松山望亭戊戌取泰興宜興授元  
帥守禦國用先以丙申秋陞帳前總制親軍己亥夏  
疾卒庚子命勝襲兄職仍掌親軍五月陳友諒陷太  
平遂寇龍灣 上命勝等戒備勝與諸將擊友諒於  
石灰山殺傷相當勝率敢死士直衝其中堅遂大破  
之溺死者數萬俘獲七千友諒僅以身免 上命勝

追至采石友諒復敗遁遂復太平辛丑二月攻高郵  
八月從上親征友諒長驅至江州友諒倉皇棄城  
走武昌遂克之陞都護癸卯三月張士誠兵圍安豐  
益急勝從上往同諸將奮擊之敵敗走追奔踰境  
陞同知樞密院事甲辰降陳理於武昌克廬州乙巳  
取江西諸郡復同徐達常遇春率馬步舟師進取淮  
東十月克海安閏十月克泰州十一月徐達攻高郵  
上恐深入敵境不能策應諸將乃命勝帥所部節  
制高郵諸軍而以達軍還泰州丙午三月勝克高郵  
四月下淮安安豐八月從伐張士誠先薄淝西克舊

館執吳將呂珍進圍蘇州吳元年召還京治軍府叅  
知政事九月論平吳功陞銀青榮祿大夫大都督府  
右都督是冬奉命北伐克山東益都兗州濟南戊申  
上卽位改元加兼太子右詹事二月總各衛軍馬  
取樂安元守將俞勝遁降其郎中張仲毅獲其將牛  
右丞三月引兵取汴梁四月克河南陝州直趨潼關  
守將張德欽穆薛飛等拒戰勝一鼓拔之李思齊張  
思道俱遁去遂取華州還汴梁謁上於行在上  
慰勞之授右副將軍留守汴梁十月調征山西克武  
涉懷慶獲壯士八百餘人兵至太行山碗子城破其

關元守兵奔潰進取澤州平章賀宗哲等棄城遁留  
兵戍守克潞州太原至猗氏擒元右丞賈成攻平陽  
克之擒李茂克絳州擒田保保徐伯昌獲將士五百  
餘人授征西將軍二月克河中陝西三月取鳳翔李  
思齊西奔臨洮獲其部將薛平章等四月取龍州鞏  
昌總京衛兵征臨洮思齊降五月從大將軍攻圍慶  
陽擊敗張良臣於西閤復與大將軍謀移軍驛馬關  
絕良臣聲援八月遂克慶陽承制統兵鎮守節制各  
鎮兵軍規措糧餉河州等處以次俱下十二月回京  
賜白金二百兩文幣十五表裏三年正月上以王

保保等爲西北邊患命勝爲右副將軍帥師自潼關  
出西安以擣之三月大破擴廓帖木兒於定西王保  
保等俱北竄四月自泰州渡至略陽擒元平章蔡琳  
遂入沔州又遣金興旺張龍入連雲棧合兵攻興元  
克之又西平土番征哨極於西北至冬凱還論功特  
進榮祿大夫右柱國封宋國公與同叅軍國事食祿  
三千石賜誥命鐵券四年守鎮陝西修治城池賜臨  
濠地若干頃守墳人百五十戶儀仗戶十九家仍賜  
第於京師五年詔爲征虜大將軍與傅友德陳德等  
北征遇虜兵於別力篤山戰敗之擒獲將士甚衆乃

分兵由西道取甘州破元將失剌罕兵敗朶兒只把  
於虎刺罕口分布戍守扼塞關寨始還六年七年練  
兵北平繼往大同八年回鎮陝西九年練兵西征十  
年鎮河南五月夫人何氏卒於京 上遣使齎報  
訃 召還議葬事十一年回鎮十二年董建周王宮  
殿十三年冬故元平章乃兒不花等寇邊明年正月  
上命徐達率師討之命勝佩大將軍印節制河南  
撫軍恤民兵欣附至十八年 上以久鎮於外爲  
勞 召還遣禮曹齎羊酒慰勞之其年秋總兵北征  
屯兵絳橋操練是時殘元遺孽歸服殆盡惟納哈出

尚擁衆金山時爲邊患二十年佩征虜印總步騎三十萬往征師抵金山納哈出懼而遁勝遣精騎窮追納哈出知不可免乃乞降所部二十餘萬咸附悉驅入山海各城屯住捷聞上大悅卽旋師城大寧二十三年秋詔還鄉賜緡鑑金帛甚厚二十四年秋命率山西平陽等郡塚軍發大同等衛屯種三十二年十月卒 朝廷哀悼遣祭勅有司治喪葬

補遺

李善長

李善長定遠人

上畧滁陽晉謁道旁留幕下掌書



記謀軍機畫饋餉甚見親信一日上從容問曰四方戰鬪天下何時定乎對曰秦亂漢高帝起布衣豁達大度知人善使不嗜殺人不五載而成帝業胡元酷暴視秦尤烈以故群雄蝟奮土崩瓦解主公濠產距沛不遠與漢高帝同受山川王氣能法其所爲天下不足定也上曰漢高帝所用豪傑未有踰張良韓信蕭何三人者今徐達勇力或可方信先生可當張良蕭何乎對曰良智計絕人後世鮮比善長焉敢望良若供給饋餉或可效何上曰良不可得矣今天下才智之士可擬良者先生幸教孤孤將就見之

對曰世豈乏才顧善長不能悉知惟知金華宋濂博  
學洽聞且知象緯上曰以孤所聞知象緯莫如青  
田劉基者上發采石援南昌征武昌善長皆留守  
甲辰奉 上爲吳王陞右相國上言湖廣邊務議江  
右湖廣魚課歲可得穀一百餘萬石資餉李濟據濠  
爲書招濟濟乃降戊申正月上卽皇帝位兼少師二  
月進 郊社宗廟議五月上幸汴議定都又議取元  
都八月駕還大封功臣 上諭諸將曰善長雖無汗  
馬之勞然事朕久足軍食功甚大宜進封韓國公食  
祿四千石券文比以蕭何四年正月致仕賜臨濠地

墳佃戶董建臨濠宮殿七年以弟存義爲太僕丞移  
江南民四十萬墾濠田命總田事八年秋南安侯監  
田弗勤又勅留鳳陽者數年子祺尚皇長女臨安公  
主爲駙馬都尉歲祿六百石十三年正月胡惟庸叛  
辭連善長群臣請逮獄上不忍罪勿問乃奏還儀  
戶旣上仍給之御史復命理臺事二十三年春肅清  
逆黨榜列勲臣五十七人善長名在上列會有星變  
其占爲大臣災御史再劾遂暴卒年七十七